



र 5/

# तुबारी

www.pangi.in

अब अंग्रेजी, हिन्दी त  
पंगवाड़ी भाषा अन्तर असी।

Issue 84; 05/03/2019

## बिषय सूची

चोउर मुखे कथा	1
सोबी केआं सुखी मेहणु	2
यक दुआ	2
धन्यवादे प्रार्थना	3
दुष्ट आधिवाड़े	4
लखे टके बोके	4


## चोउर मुखे कथा

सुआ टेम पेहलकण बोक भो। यक राजा थिआ। तसे मन अन्तर यक बोक आई। से सोचुण लगा कि संसार अन्तर त मुखी के कोई कमि नेई। पर अउं चोउर मुखे हेरण चहांता। राजे अपु बजीर जे बोलु, “ तु गा त चोउर मुखे ईं तोपण, जेन्के ईं दोका कोई न भोल।” बजीरे बोलु, ‘जे अजा, राजा जी! सच्चे मन जुए तोपणे बाड़ी, की न मेतू? तोउं से घेई गा।



सुआ दूर घेइ कई तस यक मेहणु का। जे यक मंगाई कई मिठई, सुट, दुपटा त सुआ समान नी कई होर गां जे घेण लगो थिआ। बजीरे तेस मेहणु केआ पुछू, “कि बारा! अतो समान घिन कइ को जे गोओ असा। से अतो

खुश थिआ त कि तसे खुर भीं टिगोरे न थिए।



“तैं अतो खुश भुणे बझह अउं जाणण चहांता।

छने, मोउं बताण दिए ना। बजीरे बोलु। तेन मेहणु बोक टालणे सुआ कोशिश की, किस कि से अपु जगाई झठ पुजण चहांताथ। पर बजीरे से घेण न दिता त बार बार तेस केआ पुछण लगा। से मेहणु बोता “मोउं चरे भो असु त घेण दे।” पर बजीरे से घेण न दिता त तेस केआ पुछता रेहा। अखिरकार, तेन मेहणु बोलु “मोउं चरे असु, पर फिर बी अउं तउ बतांता। में जुएली दोका धाणि रखो असा। से दुहे जेई आज ब्याह करण लगो असे। अउं तेन्के ब्याहे धाम खाण जे गओ असा।” बजीरे सोचु, अस केआं बध मुखे होर कऊं भुन्ता? तउं बजीरे तेस जे बोलु, “अउं राजे बजीर भो। हंठ राजे दरवार। तउ अउं राजे केई नेता। पहले तु राजमहल चल, तदिया पता गा तु धाम खाण जे। राजे नउ शुण कई से मेहणु डर गा। पर तेस विचारे मजवूरन बजीर जोइ राजेमहल घेण जे तियारी गा।

बजीर त से मेहणु हंठते-हंठते घेण लगो। अगर घेई कइ बथ तेन्ही यक मेहणु घोडी पुठ अओ का। से अपफ त घोडी पुठ बिशो थिआ पर तसे मगरी पुठ बोडी गठड़ी थी। बजीरे तेस मेहणु केआ पुछू, “की बारा भाई! अ कि ममला असा? अपु मगरी पुठि भार तु अपु घोडी पीठ पुठ किस न छता बे।”

तुबारी पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारी पत्रिके एसे कोई जिम्मेबारी नेई। तुबारी पत्रिका सिर्फ भाषा सुहलियत करण जे यक मंच देण लगो असी।



## खास दन


तुसी सोभी पुरे तुबारी  
टिमे कनरा उनोणी के  
त नौउ रात्री बधे।

धाणि त तसे जुएली केआं अब सते बंटी अठ फेरे लवाण चाहिए। सत फेरे तेन्के व्याहे, आठुं जे फेरा असा, से कुई जे लवाण चाहिए कि से कुई बचांते त तेस पढ़ान्ते ।



तेन मेहणु बोलु! “में घोडी गभुरवाली असी। इस टेम असे पीठ पुठ अतो भार रखुण ठीक नेई। अ मोउं डिलुण लगो असी, एइए काफी असु।” बजीरे से मेहणु बी अपफ जोई सथियर छड़ा।


अब बजीर दुहि मेहणु साते नी कई राजमहल पुज गा। बजीरे दुहे मेहणु राजे अगर आणन्ते त बोलु, “राजा साहब! इ चोउरे मुख तुं सामड़ी असे। राजे बोलु, “अ त दुइए जेइ असे। होरे दुई कोठि असे?” बजीरे झठ बोलु, “टेका मुख तुस अपफ असे। जेस ईं मुखी हेरणे जरुरत पड़ी। होर, चौथा मुख अउं जे अन्ही मुखी तोप कई तुसी कई घिन आ।” राजा बजीरे बोक शुण कइ खुश भोई गा। राजे जपल तन्हि दुहि मेहणु के बारे पूरी कहानी बजीर केआं शुणी त हँस-हँस कइ फुटि गा।




### सोबी केआं सुखी मेहणु

**मते** रोज पेहले यक राजा थिआ। तस केआं ज्यादा रुपेई होर केसे कई नेओथ। तेस केआं सुआ जिम त बग थिए। त से अपु मरजि जुएइ राज कताथ। पर से कदी खुश न भुन्ताथ कि तस कई एति चीज असी।

यक रोज से अपु नौखर जे बोता “तु धिक धरति घुम आई। इस कोणे केआं त ओस कोणे तकर। अगर कोई खुश बन्दा मेआल त तसे चलण इए घिन आई। यक लिंग अगर तसे चलण मोउं मेआल त अउं बि खुश भोई घेन्ता त रोज खुश रेहन्ता। पर अगर तु बजन चलणे आ त तें म्युकुइ अउं इठ टंगांता”।



से नौखर अपु झोड़ा जुइ हेरता त घेई घेन्ता। से सुआ दुर घेन्ता त तसे कोई नोऊ, दश मेहने भोई घेन्ते। राजा बि तस भाड़ि-भाड़ि कइ थक गो थिआ। त यक रोज से अपु महल केआं हेरता कि कोउं लोटिण दी-दी कइ एण लगो सा। त से जपल भेइ पुजता त राजे पता लग घेन्ता कि ए से नौखर भिन्थ। राजा हेरता कि तस नौखरे हथ खालि असे। त तेस लेहर एई घेन्ति।



से बेहर घेई कइ तेस नौखर जे बोता “तोउ कई यक मिनट टेम असा अपु सफाई देण जे कि तेई चलण किस नेई अण्हो”। से नौखर बिचारा लेरो-लेहयर भोई कइ बोता “महाराज, मोउं यक बन्दा मेओ थिआ जे कि हमेशा खुश रेहन्ताथ। त राजा बोता, अच्छा! त तेसे चलण किस न अण्हा तेई”? से नौखर बोता, “महाराज, जे मेहणु हमेशा खुश रेहन्ता, से यक गरीब वंदा असा, तस कई कोई चलण नेओथ।

**कुछ बझई जोई तुबारि पत्रिका अगले दुई मेहने ना छपती। सोबी ट्यारे पाठक जे तुबारि टीम दुख जतान्ता।**

### यक दुआ

“ए परम पिता, तें नोउए बोडी इज्जत भो त तुं इच्छा इस धरती पुठ पुरी लौती भो।

हैं दिन भइ रौंठि हर रोज हैं धे दिआ करे, त हैं सोब पाप माफ करे, किस कि असी बि होरे मेहणु माफ किओ असे, जे हैं विरोध कते। त परीक्षा अन्तर असी पाप करुं केआं बचाई रखा।”




# धन्यवाद प्रार्थना





अउं हर बक्त परमेश्वर जे धन्यवाद बोता रेहंता,  
 तसे गुणगान लगातार में मुँहे बड़ भुन्ति रेहंती।  
 अउं परमेश्वर पुठ घमण्ड कता,  
 शरीफ मेहणु ईं शुण कइ खुश भुन्ते।  
 मोउं जोई साते परमेश्वरे जई करे,  
 त एईए अस मीड़ कइ तसे नउए स्तुति करु!  
 अउं परमेश्वरे भेएइ गा, तिखेई तेन में शुण छइ,  
 त अउं पूरी रीत जोई नडर कइ छड़ा।  
 जेन्हि तसे कना जे नजर की, तेन्हि रोशनी मेई,  
 त तेन्के मुँह काणा कदि ना भुन्ता।  
 इन दुखी मेहणु हक दीती, तिखेई परमेश्वरे शुणी छइ,  
 त से तसे सोबि कष्टी केआं बचाई छड़ा।  
 परमेश्वर हेर डरणे बाड़ी के चोहरो कना तसे दूत पेहरा लाई कइ तेन्हि बचांता।  
 परखी कइ हेरे कि परमेश्वर कतो भला असा!  
 कतो धन्य असे से मेहणु जे तसे खुर पड्डे एन्ता।  
 ए परमेश्वरे शुचे मेहणुओ, तस हेर डरे!  
 किस कि तसे हेर डरणे बाड़ी केसे चीजी घटी ना भुन्ति!  
 जुवान शरी त घटी भुन्ति त से दुके बि रेही घेन्ते,  
 पर परमेश्वर तोपणे बाड़ी केसे खरी चीजी घटी ना भुन्ति।  
 ए कोईओ, एईए में शुणे, अउं तुसी परमेश्वरे हेर डरुण शिचालता।  
 से कोउं मेहणु असा जे जिन्दगी इच्छा रखता,  
 त लम्मी उमर चाहांता ताकि भलाई हेर सकियाल।  
 अपु जिभुड़ बुराई करण केआं रोक रख,  
 त अपु मुँहे ख्याल रख कि तेस अन्तरा छले बोके ना निसेल।  
 बुराई छइ दे त भलाई कर, मेल मिलाप कर त तसेरी पता हंठ।  
 परमेश्वरे तीर धर्मी मेहणु पुठ लगोरे रेहंते, त तसे कन बि तेन्के दुहाई कना जे लगोरे रेहंते।  
 परमेश्वर बुराई करणे बाड़ी हेर मुँह खरकई छता, ताकि तेन्के याद धरती पुटा खतम भोल।  
 धर्मी मेहणु दुहाई देन्ते त परमेश्वर शुणता, त तेन्हि हरेक किसमी बपताई केआं बचांता।  
 परमेश्वर टुटो मन बाड़ी के साते बिश्ता, त भुंजो मेहणु छुड़ान्ता।  
 धर्मी मेहणु पुठ सुआ बपता त एन्ती, पर परमेश्वर तेस तेन्हि सोबी केआं अजाद कइ छता  
 से तसे अलोटे रक्षा कता, त तेन्हि अन्तरा यक बि ना टूटता।  
 दुष्ट त पापी मेहणु अपु बुराई बेलिए मरी घेन्ता, त धर्मी मेहणु के बैरी पुठ दोष लगता।

## दुष्ट आधिबाड़े




केनि यक मेहणु दाछि डाई के बगिंचा ला। तसे चोहरो कना बाड़ बन्ह छड़ा, त दाछि रस किढुण जे पलण अन्तर खपोर बणा, त पेहरा देण जे छपिर बणाई कइ मेहणु के धे आधी दी कइ परदेश जे घेई गा।

तोउं, फले टेम तेन आधिबाड़ी केई अपु यक नौखर लंघा कि तेन्हि केआं अपु आधि घिन एईयाल। पर तेन्हि से टाई कइ मडा त खाली हथ लंघाई छड़ा। पता, तेन यक होरा नौखर तेन्हि केई लंघा; तेन्हि तसे मगिर भन्नि त सुआ बेजति की। त तेन यक होरा लंघा; तेन्हि से मार छड़ा। पता तेन सुआ जेई लंघे; तेन्हि अन्तरा आधी के मडी-मडी बुरे हाल कइ छड़े त आधे जेई मार छड़े।



अखिर अन्तर, यके जेई रेही गो थिआ, जे तसे ट्यारा कुआ थिआ; पता तेन से तेन्हि केई ईं सोच कइ लंघा कि से में कोये इज्जत करियेल। पर तेन्हि आधिबाड़ी अपफ बुच बोक विचार किआ, 'एईए त हकदार भो; चले, अस एस मार छते। तोउं ए पूरु हें भोई घेन्तु'। तोउं तेन्हि से टाई कइ मार छड़ा, त दाछि बगिंचा केआं बाहर फटाई छड़ा।



त बोले, बगिंचे मालिक की कता? से एई कइ तेन्हि आधिबाड़ी मुकाई छता, त दाछि बगिंचा केसे होरी के धे दी छता।”

## तुबारि मासिक पत्रिका

- ◆अस इ उम्मिद करं लगो असे कि एण बाड़े रोज अन्तर सुआ मेहणु इस कम अन्तर साथोट देन्ते।
- ◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पढ़ु जे त भाषाई सुहलियत करण जे इ पत्रिका शुरु किओ असी।
- ◆तुबारि यक अवाणिज्यिक पत्रिका भो।
- ◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगो। अगर कोई ईं सोचता बि त अस जिम्मेबार नेई।
- ◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ◆आर्टिकल्स ना मिलेल, या घाटि मेहणु के साथोट ना मिलेल त तुबारि पत्रिका कदी बि बंद भुई सकती।
- ◆कोई चीज छपां असी या नेई छपां जे तुबारि संपादकीय टीम पुरा अधिकार असा।
- ◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव ओर आर्टिकल्स रखुं जे सुविधा किओ असी।
- ◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

### तुबारि संपादकीय टीम

9418429574

9418329200

9418411199

9418904168

9459828290



## लखे टके बोके



- समझदार मेहणु के मन अन्तर यके धमकी बेलि असर भोइ घेन्ता, पर मुख मेहणु मन पुठ सोउ लिंगि मार खाणे बेलि बि असर ना भुन्ता।
- बुरा मेहणु हमेशाई झगडे फसाद करणे कोशिश कता, तोउं त तेस केई धुर्त दूत लघेईता।
- जे मेहणु भलई बदले बुराई कता, तसे गीहा बुराई कदि दूर ना घेन्ती।
- झगड़ा शुरु करण हाउदे पणि ईं असु, झगड़ा बधण केईया पहलेई छड़ देण।
- जे दोषी मेहणु नरदोष, त नरदोषी मेहणु दोषी ठेहरांते, तेन्हि दुहि हेर परमेश्वर नफरत कता।
- मतर हर बक्त परेम जुएई बिश्ता, त बपताई टेम भाई बण घेन्ता।